

O Tamali'i Samoa Ma Lo Latou Sao I Le Tau Amataina O Le Ekalesia

Matagaluega o le Tala Faasolopito o le Ekalesia

Kolisi Faafai'feau i Malua

Pepa Mafutaga Faafouina 2025

Rev. Dr. Arthur Wulf & Fraser Tauaivale

Faatalofa

I le suafa manumalo o Iesu Keriso, ou te ofo alofa ma faatalofa atu ai i le mamalu o le mafutaga – lau susuga i le Taitai, le saofaiga malu a Tamā o le Ekalesia, susuga i Toeaiina, Faafeagaiga, le Aufaigaluega Paia a le Atua. Ae o le a agai loa se taumafaiga i le vaega lona lua o le pepa e pei ona folasia e le susuga i le Sui Pule.

O le mau a le faifeau misionare a le Ekalesia Metotisi – le ali'i o Martin Dyson – fa'ato'ā amata aloa'ia le Ekalesia LMS (church) i Manono i le tausaga e 1838.¹ E peisea'i o le amataina o le ekalesia e tusa ai ma le finagalo o Dyson, sa faamoemoe lea i le o'o atu o papalagi o le LMS. Ae e fete'ena'i foi lenei manatu, le aloa'ia o se faamoemoe pe a auai papalagi, ma le Taaao nai Faleū ma Utuagiagi, aua e lē o ni papalagi na avea ma uluai faiaoga o le lotu Metotisi i Manono, ae o tagata Toga lava na faasafua i Salua ma Faleū i le tausaga e 1835.

E manatu foi nisi, o le vā lelei o tagata Manono ma Toga, o so'otaga mai anamua ma so'otaga i aiga a tupu, na mua'i o'o atu ai le lotu (Metotisi) i Manono a o le'i taunu'u atu ai se faiaoga o le LMS.² Ina ua liliu le tupu Toga o Taufua'ahau i le lotu Metotisi, na ia faamavae atu ai lea i le tele o ana āvā, e aofia ai ma le tama'ita'i

¹ Martin Dyson, *My Story of Samoan Methodism*, (Melbourne: Fergusson & Moore, Printers, Flinders Lane East, 1875), 18. O Martin Dyson, o le faifeau Metotisi lea sa tofia e le Wesleyan Methodist Missionary Society (WMMS) e galue i Manono. Na amata lana galuega i le tausaga 1857.

² Malama Meleisea, et. Al, *Lagaga: A Short History of Western Samoa* (Suva: University of the South Pacific, 1987), 60.

Manono o Salata (po o Salote), le afafine o Tuilaepa Esekia Matetau mai Apai. O le tausaga e 1832 na malaga ai Taufua'ahau i Manono e momoli Salata i lona aiga. Fai mai ina ua tū laueleele le malaga i Manono, na taitaiina ai e le matai Metotisi mai Toga, le ali'i o Mafoa, se tapuaiga. O le ala foi lea na amata ona liliuina ai tagata Manono i le lotu Metotisi.³

A o le mau a misionare papalagi o le LMS, o le tausaga e 1836 na mua'i taunu'u mai ai i Samoa misionare papa'e na tofia e nonofo tumau ma galulue i Samoa. O le tausaga lea na filifilia ai Misi Ite (Thomas Heath) e galue i Manono. Na mua'i fa'amautū Misi Ite i le maota o Matetau i Apai. E tusa ai ma le mau a Misi Ite, o le tausaga e 1837 na muai amataina ai le Ekalesia LMS i Manono.⁴ Peitai ane, o le galuega a le LMS i Manono ma le uluai taumafaiga e faa Talalelei le motu, e lē o se galuega na amataina e so'otaga a Manono ma Toga; e lē o se galuega foi fa'ato'ā i le 1832, 1835, 1836 po o le 1837. E taunu'u atu Taufua'ahau ma Mafoa i Manono, ua leva faagaioi le galuega a le LMS ma Matetau i le motu. E taunu'u atu Peter Turner i le Taeaonai Faleū ma Utuagiagi, o tagata o le LMS i Manono na talimaālō i ai.⁵ E malaga atu foi Misi Ite i Manono, ua toatele tagata Manono o lo o auai i tapuaiga ma aoga a le LMS. O le fa'a Talaleleiina o Manono, o le galuega lea sa mua'i faia e Tuilaepa Esekia Matetau.

³ Tulei Tulei, "Why Manono? The Original Destination of the Wesleyan Missionaries in Samoa," (BD thesis, Piula Theological College, 2019), 31 – 32.

⁴ The Samoan Reporter, Setema 1847. Silasila ane ia ⁴ Richard Moyle, *The Samoan Journals of John Williams 1830 and 1832* (Canberra: Australian National University Press, 1984), 82; Faulalo Kennar, "A History of the Apai Manono Congregational Christian Church Samoa, 1830 – 1881," (BTh thesis, Malua Theological College, 2019), 23.

⁵ Dyson, *My Story of Samoan Methodism*, 18.

Maliega a Ioane Viliamu ma Matetau (Aukuso 25, 1830)

Na tuuina aloa'ia e Ioane Viliamu faiaoga o le Talalelei ia Malietoa ina ua mae'a le feiloaiga i Matāniufeagaimaleata, i Sapapalii. A o sauni le faigamalaga a le Savali o le Filemu e toe taliu e faaauau nisi galuega a le LMS, i le aso 25 o Aukuso, 1830, na afea ai e le tamāli'i Manono e suafa ia Matetau ma le palagi o John Wright le va'a lotu.⁶ O lea feiloaiga na faaoo atu ai le finagalo o Matetau i alii misionare, e fia tuuina atu lona atali'i e faimalaga ma Viliamu.⁷ E peiseai o le faamoemoe o le talosaga, ia aoaoina le atalii o Matetau e avea ma faiaoga o le Talalelei e faia le galuega faa faiaoga i Manono. E le'i taliaina e Viliamu le talosaga. O lea na momoli ai loa le manaoga a Matetau ia Viliamu mo ni faiaoga LMS e o mai e aoao le motu o Manono i le Talalalei. Na ioe Viliamu i lea talosaga. O lea na na ta'uto ai loa Matetau o le a ia faia se fale tapuai/fale lotu e fai ai le galuega a faiaoga pe a latou taunuu mai.⁸

Ina ua tu'ua e Viliam Samoa, na fesoasoani malosi Mulipola Fauea – le ali'i Samoa lea na malaga faatasi mai ma Viliamu - i le faasalalauina o le Talalelei i Samoa.⁹ Sa taulamua lava Fauea i le faasalalauina o le Talalelei i tagata o ona aiga ma nu'u. Ai o le mafuaaga lea e toatele ai matai ma tagata na filifili faapitoa e aiga ma nu'u, e aofia ai ma sui o Manono, na tausavali ma faamautu i Sapapali'i ina ia aoaoina e

⁶ O Joh Wright, o se palagi na aumau i Manono i lea vaiata, ma na avea o ia ma faaliliu upu i le va o Matetau ma Viliamu.

⁷ Richard Moyle, *The Samoan Journals of John Williams 1830 and 1832* (Canberra: Australian National University Press, 1984), 84

⁸ Moyle, *The Samoan Journals*, 85.

⁹E talitonu nisi i Manono, o le o'o atu o Fauea i Toga, o se sulufa'iga na afua ona o le tula'i mai o le toa sauā o Leiataua Tamafaiga mai Manono. O Fauea o se suli moni o le aiga Sā Mulipolā i Salua Manono, o le sootaga foi lea a Fauea ia Tamafaiga. E foliga mai la i lea mau, o Fauea o se tagata na lamatia lona soifua ina ua tula'i mai Tamafaiga. Pe a ma le 11 tausaga na nofo ai Fauea i Toga a o le'i toe malaga mai i Samoa i le 1830. O lo o i ai se ma'a faamanatu i Salua Manono i elelele o le aiga Sa Mulipolā i le tuugamau o Fauea e faamanatu ai lona sao i le faa talaleleiina o Samoa. Silasila ane i le tusiga Afa Afato, "Manono O Le Motu O Le Feagaiga," (BD thesis, Malua Theological College, 2000), 31.

faiagoa o le lotu. E ta'i masina na nonofo ai nei tagata Sapapali'i, a o le i toe malaga atu i o latou nu'u e aoao tagatanu'u i mea ua o latou iloa.¹⁰

Ua Toe Taliu Mai Viliamu i Manono (Oketopa 27, 1832)

O le toe taliu mai o Ioane Viliamu i Samoa i le 1832, na ia molimauina ai le olaola o le Talalelei, ae maise ona o le naunau a tagata Samoa e pei o Amoamo, le toa lea na malaga mai Leone e aoga i Sapapali'i ma toe foi atu i Leone e a'oa'o tagata o lona aiga ma lona nu'u i le Talalelei.¹¹ Ina ua afea e Viliamu Sapapali'i, na ia vaaia ai foi le toatele o tagatanu'u na aoga tausavali atu i Sapapali'i mai Upolu, Savaii, Tutuila, ma Manono.

Na aga'i atu Viliamu i Manono ma le faiagoa Rarotoga e suafa ia Teava i le aso 27 o Oketopa, 1832.¹² Na ia asiiasi i pitonu'u eseese o le motu, ma na ia matauina ai le toatele o tagata Manono ua fai a latou lotu e tapuai atu ai i le Atua o le Talalelei. O se faamaoniga lea o le naunau o tagata Samoa i le Talalelei, ae maise i latou na aoga tausavali atu i Sapapali'i a o le i fo'i mai Viliamu. Na fesoasoani John Wright le faaliliu upu i fesoataiga a Viliamu ma tagata Manono. O lea na faailoa atu ai e Viliamu i matai o le afioga ua i ai le faiagoa mo Manono o le a faamautu i Apai.

Na tōina e Matetau se eleele o lona aiga Sā Tuilaepa i Apai e fai ai le fale e nonofo ai Teava ma lona faletua.¹³ O tapuaiga ma aoga sa mua'i faia e Teava i le fale tele o le aiga a Matetau, ma sa molimauina le faatumulia o sauniga ma aoaoga e tagata o le motu.¹⁴ I le vā o le tausaga 1832 ma le 1835, na faa meaalofo ai e Matetau se

¹⁰ Moyle, *The Samoan Journals*, 134 – 135.

¹¹ Moyle, *The Samoan Journals*, 107.

¹² Moyle, *The Samoan Journals*, 157.

¹³ Faulalo Kennar, "A History of the Apai Manono Congregational Christian Church Samoa, 1830 – 1881," (BTh thesis, Malua Theological College, 2019), 26.

¹⁴ Moyle, *The Samoan Journals*, 165.

eleele i Apai e fau ai le uluai fale sã o Manono.¹⁵ O le ofoina atu e Matetau o lona maota ma fanua a le aiga Sã Tuilaepa mo le galuega a le Atua, o pine faamau nei o le matuã taliaina e Manono o le Talalelei. Auã foi o fanua ma eleele o measina Samoa e tatau ona taofi mau e tua ai tupulaga fai mai. Peitai, o le loto fuatia ifo lelei lava a Matetau ma tua'ã o le atunu'u na afua ai ona o latou fai taulaga i le galuega a le Atua e ala i le ofoina atu o o latou faasinomaga mo le Talalelei.

Fai mai le molimau a Teava na tusi ia Viliamu:

Ua ou fialia lava i lea nofoaga. E agalelei tele matai. O lo o latou feagai ma le tausiga o a'u. Na fai le matou tapuaiga ananafi i le fale tele. Sa faatumulia lava i tagata lotu. Ua avea le matai (Matetau) ma le toatele o tagatanu'u ma Kerisiano. O le taeao lenei na faaauuina ai aoaoga i le fale tele, ma na toatele i latou na naunau mai lava i le aoga. O lo o fialia ma mafanafana lava i matou.¹⁶

E manino lava i le molimau a Teava le faaeaea ma le faaaloaloga o le Talalelei e Matetau ma tagata Manono. A o se faaaloalo na matuã taulamua lava Matetau e faatino.

¹⁵ Kennar, "A History of the Apai Manono CCCS," 26.

¹⁶ Na galue lava Teava i Manono se'ia o'o i le tausaga e 1837. Na si'itia Teava e faaauau le galuega faa faiaoga i le motu o Aunu'u i le tausaga e 1837, ae i le tausaga e 1838, na ia galue ai i le nu'u o Leone se'ia o'o i le tausaga e 1869. Moyle, *The Samoan Journals*, 165.

Taulamua i le Galuega a le Atua

O le tasi lenei o faafitauli sa feagai ma Matetau, Teava, ma Misi Ite i le galuega i Manono, o le auai o tagatanu'u i taua. E ui ina faaliliuina tagata Manono e le LMS, ae sa faigata lava ona tu'ua le latou auai i taua. A o taua foi na lauiloa ai Matetau i aso o lona talavou a o lē i taunu'u mai le Talalelei i Samoa. Ae ina ua talosagaina e Matetau se faiaoga mo Manono, na amata ona matauina suiga o lona soifuaga.

O le taulamua a Matetau i le faamaopoopoina o le Talalelei mai lava i le 1830, na ia matuā fultua ai lava i tū ma aga faapaupau e pei o taua. Na suia e Misi Ite lona suafa ina ua papatiso o ia, ma ua lē toe igoa ia Matetau, a ua igoa ia Esekia. Sa ia tauaveina pea le faaeaea o lona aiga, e ala i le suafa Tuilaepa i Apai. O upu nei o lo o faamauina i saafiafiaga o le tusitala o le Sulu Samoa ina ua maliu Matetau:

Talu ona lotu ia, ui lava ina igoa ia Matetau, ua lafoaiina ana fana ma au upega sa fiafia ona tau ai anamua; e lei toe fia fai ma toa faa-lelalolagi nei, a ua faamalosi i le taua e sili ona lelei. Sa faatupu e ia le afioga a le Atua ma le amio-atua...¹⁷

Na pine lava le telē o le sao a Matetau, Teava, ma Misi Ite i le faa Talaleleiina o Manono i le 1839. O le tausaga lea na alu ai le uluai malaga faa misionare a tagata Samoa i le atu Pasefika, ma sa auai atu ai ma sui o Aiga i le Tai: o Sa'u mai Apolima, ma Leiataua, ma Ioane mai Manono.¹⁸ O le malaga faa misionare i le

¹⁷ O Le Sulu Samoa, Aokuso 1847.

¹⁸ Latu Latai, "Covenant Keepers: A History of Samoan (LMS) Missionary Wives in the Western Pacific from 1839 to 1979," (Ph.D. thesis, Australian National University, 2016), 94.

1840 na taitaiina e Misi Ite, na malaga ai le faiaoga o Teava ma Atamu ma Mataio mai Manono.

E ui ina faamautū Teava ma Misi Ite ia Matetau, ae na te lē i taofia le alii faiaoga ma le alii misionare i Apai. O le mafuaaga foi lea na tofusia ai pitonu’u a Manono ma fale tapuai ma fale aoga faapitoa mo le LMS. E taunu’u le faiaoga Metotisi o Barnabas Ahogalu i Salua, ma le isi faiaoga Toga i le maota o Taegogo ma Vaovasa i Saleiataua i le 1835,¹⁹ ua foi mai ai le galuega a Teava ma Matetau. E malii Matetau i le 1847, ua tolu fale tapua’i o le LMS i le motu o Manono (Apai, Salua, Saleiataua).²⁰

Upu Fa’ai’u

E telē le sao a tua’ā o le atunu’u i le faamautuina o le Talalelei a le Atua i Samoa nei. O le latou naunau ina aoaoina i latou i le Talalelei na mafua ai lava ona o latou lē faatali mo isi faiaoga o le LMS, ae na faamaopopo lava o latou aiga ma tausavali i Sapapali’i ina ia aoaoina o latou tagata.

O le galuega sa faia e Tuilaepa Esekia Matetau, e lē o se galuega e fuatasi lava i Manono, auā o le auala foi lea na faa Talaleleiina uma ai nu’u ma afioaga. O le naunau foi o tua’ā i le galuega o le Atua lea na fa’ama’itea ai le ofoina o fanua mo le lotu. O se taulaga na faia ma le loto atoatoa ina ia tumau pea le Talalelei i nu’u ma afioaga mo augatupulaga fai mai. E o’o mai lava i nei ona po, o lo o tausila lava e sulii ma feoi le faaeaea o Matetau i le Talalelei, e ala i le faatumauina o le Ekalesia i fanua o Feletoa i Apai.²¹

¹⁹ Dyson, *My Story of Samoan Methodism*, 19. O Saleiataua ua vaeluaina i nei ona po i nu’u e lua: Lepuiai ma Faleū.

²⁰ Samoan Reporter, March 1845. Silasila ane Dyson, *My Story of Samoan Methodism*, 18 – 19.

²¹ Kennar, “A History of the Apai Manono CCCS,” 36.

O le sosolo o le Talalelei i Manono, na taulamua ai matai o le atunu'u. O le ala lea e taua ai le manatua pea o le sao a nai o tatou tua'ā, aua o i latou lava lea na amatamea i le fofolaina o le alafua o le soifua ofoina mo le Atua. O toe upu a Misi Ite i saafiagiaga mo le tamā ia Tuilaepa Esekia Matetau,

Mai lava i le taimi o le ma mafutaga se'ia o'o ina maliu o ia, sa tumau lava lona agalelei, ma sa ia naunau lava e fesoasoani...o ia o se tagata na tumau lona faatuatuaga faa Kerisiano... O toe itula o lona soifua na ia faaaogaina e fautua atu ai i lona aiga i ala faa Kerisiano, ma tatalo ai mo i latou...Na ia tatalo faa tolu – mo ia, mo ona aiga, ma le faamoemoe o le Talalelei.²²

E manatua pea ma le agaga faafetai i le Atua e fanau ma tupulaga fai mai a Manono le faaaogaina e le Atua o Tuilaepa Esekia Matetau ma Mulipola Fauea i le Talalelei.

Manuia le mafutaga,

Arthur Wulf & Fraser Tauaivale

²² Samoan Reporter, September 1847.